



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Ukraine rara tera samatsütsü
Russia nukjïdong lir: Putin**

**Real Madrid-i Dean
Huijsen alizükogo**



VOL. XXII ISSUE NO. 214 (ADOK 214)

DIMAPUR

TENTONÜ (MONDAY)

MONUPII (MAY) 19, 2025

₹ 5.00

DMC-i CNCCI sentong nung meyariteper

Dimapur, May 18, 2025 (TYO): Confederation of Nagaland Chamber of Commerce and Industry (CNCCI)-i May 19 nungi mapang telatet makai shishilembabaren shibangtsü ayongzükba nung Dimapur Municipal Council (DMC)-i meyariteptsü metetdaksüogo.

DMC-i shishilembartem, shishilembaba teloktem aser public dang tebilemtsü khuret abentsü metetdaksüogo

Parnokisa dokan kiburtemi tetsübu kecha melii dokantem lapoktsü ayongzükogo.

Sorkari ketdangsübaren nung ashishitep malitsü aser nübo shitak shimoktsübaji kanga tongtipang saka iba amala lungkak aitba ajanga public nem timtem agütsütsü aser essential services meinprongtsü. Shilem kati akhangba onük atema public ajunga nem timtem magütsütsüla ta DMC-i metetdaksüogo.

May 18, 2025 nü DMC Councilor temi pei pei Ward nung aliba shishilembartem aser GB tem dang dokantem meshibangtsü aser yariteptsü atema shiditem züluogo.

Northeast nung Integrated Aquaparks 4 yanglutsü agizüker

Guwahati, May 18, 2025 (Agencies): Centre sorkari linük kübok tesem balala nung Integrated Aquaparks 11 lapoktsü mulunga agizükogo aser iba nung northeastern state pezü densema lir.

Northeast nung state pezüji-Assam, Tripura, Arunachal Pradesh, aser Nagaland lir ta Deobarnü Union Minister for Fisheries, Animal Husbandry, and Dairying Rajiv Ranjan Singh-i metetdaksü.

Ranjan Singh-i tanü Tripura nung yanglutsü aliba Integrated Aquapark atema lung azüngtsü aser fish festival lapoktsüba sülen iba osang metetdaksü.

"Tripura aser tanga northeastern state tem nung fish production atema lenmang sadema lir" ta pai ashi.

Centre aser state sorkartemi fish production teimba akümtsü aser tangalen nungi bener aruba ajemtsü atema külemi meranga

inyaker ta Union Minister-isa ashi.

Tripura nung Integrated Aquapark ya Kailashahar nung yanglutsü. Iba ya Unakoti district headquarters lir aser Pradhan Mantri Matsya Sampada Yojana (PMMSY) kübok Rs 42.4 crore lempzüksüogo.

Iba park nung fish breeding, processing, aser marketing atema modernize infrastructure alitsü ta Union Minister Singh-i ashi.

Union Ministry kübok Department of Fisheries ajanga Integrated Aquapark nung temulung agütsür aser PMMSY kübok tongtipang mapa ka ama züngshir.

Integrated Aquapark nung comprehensive hubs, offering hatcheries, feed mills, cold storage, processing units, training centres, aser marketing facilities ajak alitsü.

Item park ajanga lanur nem mapa agütsütsü aser tetsürtem tashi itdaksütsü ta ketdangsürtemi ashi.

PTCSU-i Phek Government College atema nenshir

Dimapur, May 18, 2025 (TYO): Phek Government College nungi tawa temelener shinga melii Assistant Professors anienba atema jashir aser iba ajanga kaketshirtemi timtem ajurutsü ta Phek Town Chakhesang Students Union (PTCSU)-i metetdaksüogo.

Iba ajanga College nung department aikati major course magitetsü. NEP 2020 - FYUGP tenzükba sülen tesayur teimba nüngdaker saka Phek Government College nung tesayur peria mali ta PTCSU-i ashi.

Tawa transfer asüba tetuyuba amaji inyakra Science stream nung department kar nungbo department ajunga reprangtsü atema tesayur ka dang asütsü aser iba ya sanctioned post kübok lir ta parnokisa ashi.

Department of Higher Education-i service rule nung tesayur ka pa/la mapa lempzükdak küm pungubosa inyaker ang

transfer meshitsü akok ta lateta lir saka parnoki yangluba service rule alema 'probation period' mapang-a tesayurtem transfer asür ta PTCSU-i metetdaksüogo.

Phek Government College nung infrastructure maparen kanga meilungi inyakba atema mepelar. 2013 nung Staff Quarters yanglutsü mapa lempzüksü saka küm 11 sülen-a mapa 50% dang inyakteta lir ta PTSCU-isa ashi.

Külen, 2021 nung Academic upgradation classroom mapa tenzük aser iba ya ita 24 tsüngda tembangtsü latet saka tang tashi mapa tesadang ka meinyak lir ta parnokisa ashi.

Anungji bangdakpurtemi Phek Government College dak sendakba onüktem atema mapa kecha meinyakra onoki ozüangi melaba ama lungkak aittsü ta PTSCU-isa tekümdangtsü olen ka shiogo.

CNCCI-i tanü nungi shishilembabaren anener

Dimapur, May 18, 2025 (TYO): Confederation of Nagaland Chamber of Commerce and Industry (CNCCI)-i May 19 nungi Nagaland kübok district 9 nung shishilembabaren anentsü saka iba nung temulungertemi dang shilem agitsü ta metetdaksüogo.

Iba mokdang ya Dimapur, Chümoukedima, Niuland, Peren, Wokha, Zunheboto, Phek, Tseminyu, aser Meluri nung alitsü.

State sorkari tesüiba küm pezü tashi shishilembartemi akhangba ama meinyaker ta

CNCCI-i ashi.

"State sorkar den aiben jembiaka aser tawa Minister aser Government Spokesperson KG Kenye ajanga yaritepa tongtepratepaka telemtetba tajung kecha magitet" ta CNCCI Chairman Dr. Khekugha Muru-i osangbener dang ashi.

Iba jagi district chambers-i mapang telatet makai shishilembabaren shibangtsü pusema nungitsü CNCCI-i bangjemogo ta Dr. Muru-isa ashi.

"Shishilembartem mepelaba sayutsü atema iba sentong agir

aser iba ya timi dang aser ozüangi melaba ama dang agitsü. Iba mokdang ya public nem timtem agütsütsü atema masü saka mebenteti aliba onüktem nung temulung agütsüdaksütsü atema lir" ta paisa metetdaksü.

State sorkari Kohima aser Mokokchung municipal council tem nung DCCI züngsem kaka züngsem saka tanüngba district 9 nungbo ibaji meinyak.

State sorkari mapang telatet ka yur ken o tem angatetteptsü nangzükra CNCCI-i mokdang agientsü mulunga lir ta Dr. Muru-isa shisem.

Nagaland nung International AIDS Candlelight Memorial amung



Kohima, May 18, 2025 (TYO): Nagaland nung tanü "We Remember. We Rise. We Lead" omen nung ajemdaker International AIDS Candlelight Memorial ayongzüka agiogo.

Nagaland nung 2006 nungi HIV/AIDS statistics bendenba nung azü sample 19,11,856 tendangogo aser tanur 1472 dena nisung 37,557 HIV positive lir.

HIV positive rongnung tanur 407 dena nisung 14,846 tashi ART ajanga taküm lia arudar aser parnok 3,676 süogo.

1990 nung Nagaland nung mezüng HIV putetba sülen HIV prevalence rate 1.37% lir. India nung Mizoram (2.73%) sülenbo HIV prevalence rate teimtibaji Nagaland lir.

"Bilemtetba ya mangyimba atema dang masü saka HIV aketertemi tasü itta aser akhümketa liyonga aruba benjungba mapang ka lir" ta Nagaland State AIDS Control Society (NSACS) nung taoba Project Director Dr. Akuo

Sorhie-i ashi.

HIV aketertem, parnok kibongtem, parnok yarirtem, NGOs, medical professionals, kaketshirtem aser tamangba teloktem den "We Rise!" sangoktsür ta Dr. Sorhie-isa ashi.

HIV atema antiretroviral therapy (ART) ya kanga tongtipang aser iba ya ajaki angutsü tim ta laisa ashi.

Lanurtem ya tarutsü lennirtem alir anungji nenoki angazüksüla aser aria bilemba den tebilemtsü khuret abentsüla. Maneni, sorkar ketdangsürtemia budgets, policies, aser public discourse nung HIV/AIDS dendaksütsüla ta Dr. Sorhie-isa ayongzük.

Kohima Network of People Living with HIV (KNP+) President Aching ya 2004 nungi ART ajanga taküm lia arur aser pai o jembidang HIV menatepa aoba noktangtsü atema mapang shitak nung screening aser testing asütsü ayongzük.

"HIV ya noktangteter aser treatment timi agira taküm kanga

junga liteter" ta lai ashi.

"1983 nungi May ita nung Deobar tasembuba ya International AIDS Candlelight Memorial ama munga arur. Iba ajanga alima nung nübortem dang AIDS ajanga asürtem nem tetushi agütsür aser HIV aketertem pusema nungittsü nangzükshidaksür" ta Nagaland Network of People Living with HIV (NNP+) President Lanu-i ashi.

Iba sentong nung NSACS, NNP+, KNP+ aser Indira Gandhi Sports Academy kaketshirtemi shimo milen tsüklok.

Iba ya tasürtem nem tetushi agütsüba dang masü saka telongjem, temeten aser temeim nung AIDS anema rarayonga aotsü tezüngzüktep agiba liasü.

Sentong nung mendenji Esther Longkumer liasü, CRC Bayavu Associate Pastor Sedekhrizeo Whuorie-i temoatsü meshia sarasadem aser Project Director NSACS Dr. Ahu Sekhose-i anküp tepela o jembi.

NPCC lenirtemi district balala semdanga jaja



Dimapur, Monupii/May 18 (TYO): Nagaland Pradesh Congress Committee (NPCC) nung lenirtemi Nagaland nung aliba district balala nung organizational tour ka May 14-17, 2025 anogotem ayongzüka agia liasü.

Lenirtem ya Member of Parliament (Lok Sabha) aser NPCC tir S. Supongmeren Jamir lenisüba nung liasü, kong AICC Secretary in charge of Nagaland, Christopher Tilak; NPCC Working Presidents C. Apok Jamir aser Khriedi Theünuo aser ano party lenirtem aika dena liasü.

Iba tour ya Mon district nung tenzüka Congress Bhavan nung sentong ka takok ngua agia liasü aser iba mapang Supongmeren Jamir, Christopher Tilak, C. Apok Jamir aser Khriedi Theünuo nungeri District Congress Committee (DCC) aser party workers den jembia Nagaland ajunga nung party tashi itshitsü asoshi arok mapa ama bendanga agütsür telungjem nung inyaksü ajungshia liasü.

Iba mapang NPCC tir S. Supongmeren Jamir-i Konyak Union aser Konyak Mothers'

Association den sensaksem tajung kaa liasü aser iba sülen pai Mon Medical College yanglua aliba tesem semdang aser district nung healthcare services tajungba kumdaktsütsü asoshi mapang shidak nung iba mozüki renemtsü tongtipang lir ta nenshia ashi.

Pai Lalit Kumar, Officer Commanding, Border Roads Organisation (BRO) ajurua region nung lenmang aser ki o jen yangluba indang jembishinüa liasü. MP S Supongmeren Jamir-i BRO dang pelaba lemsatop aser district nung lenmang tesendaktep ulushiba nung paia akok tashi yaritsü ta shia liasü.

Iba den pai Mon District Administration den sensaksem aka aser iba sülen Totok Chingnyu, Totok Chingkho aser Totok Chingha yimtsüngtem nungi Angh tem aser tebu-teti nung ajurua liasü.

Longleng district nung Christopher Tilak, C. Apok Jamir aser Khriedi Theünuo nungeri Longleng DCC ketdangsür aser party workers tem ajurua parnok dang saksalema aser party nükjidong ataloktsü asoshi bendanga agütsür inyaksü ayongzüka

liasü.

Iba sülen parnok Noklak-i ao, kong Congress Bhavan nung party workers ajurua grassroots level nung party tashi itshitsü aser lungjemshitsü atema bendanga agütsür inyaksün ayongzüka liasü.

Tuensang nung parnoki DCC Tuensang den sensaksema grassroots party worker ajungmesoa aser lenmang balala sayua liasü. Congress Bhavan, Tuensang nung District-Level Samvidhan Bachao Abhiyan (Save Constitution Campaign) aser Congress Workers Sammelan sentong takok ngua agi, kong Christopher Tilak aser NPCC lenirtemi o jembia liasü.

Iba tour ya Zunheboto nung tembang, kong ano District-Level Samvidhan Bachao Abhiyan aser Workers Sammelan sentong ka North Point nung agia liasü.

Iba sentong ya May 17, 2025 nü agi, kong MP Lok Sabha, S. Supongmeren Jamir aser lenirtem dena liasü. Iba mapang pai party workers dang pelaba lemsatop aser maneni telungjem nung tarutsü ajungtsü asoshi bendanga agütsür inyaksü ayongzüka liasü.

Assam nüburtem rongsenketzüng tsütsü timtemba temai adoktsütsü: Congress

Guwahati, Monupii/May 18 (Agencies): BJP-i aniba sorkar kübok Assam nung nüburtem rongsenketzüng tsütsü timtem ajuruba indang opposition Congress party ajanga kanga aroka shisadanger aser iba osang ya ita ana tsüngta sayatsü sentong lir, ta Congress lenir kati ashi.

Party leniri ashiba agi, iba study nükjidong ya state indang rongsenketzüng majungba timtem ajangtetsü asoshi lenmang sayatsü aser taruba küm Assembly election atema party tasa nung shilem tongtipang ka asütsü.

All India Congress Committee (AICC) national spokesperson Charan Singh Sapra-i tawa osangbener den jembidang BJP-i kanga asükumba 'double engine government' sashi-sashia aitsü aser ibai Assam asoshi 'trouble engine government' lir ta ashi.

Ruling party yagi state nung rongsenketzüng tebilemtsü koktetsü asoshi inyaker masü telemsa adokdaktsütsü ang meranger, ta Sapra-i aitsü.

"Assam nung nüburtemi rongsenketzüng tsütsü timtem ajuruba aser aji azüoktsü asoshi lenmang bushiba dak sendakba study ka agitar. Iba study sayaba sülen sorkar asoshi rongsen lenmang ka sayatsü," ta Sapra-i ashi.

Sapra-isa Assam sorkar indang beneficiary scheme tem indanga tebilemtsü lemsatop aser sen kanga indoktsüba item sentong yagi sentsüh tali kumdaktsü aser state indang senotsü tashi mait kumdaktsür

ta ashi.

"Ibai tarutsü asoshi tebilemtsü tulu asütsü. Assam-i sen jenti apua aliba ketdang sütetsü asü? Onoki ita ana tsüngta iba study nungi bushitetba sangdongtsü. Onoki Assam nüburtem asoshi sentong tejangja yanglua agütsütsü," ta Sapra-i ashi.

Congress leniri Assam sorkar indang Economic Survey report for 2024-25 indang tuteta ashi, kong average annual borrowings ya 2019-20 nungi tenzüka küm asem tsüngta shilem 78 jungnüa akumba sayur.

Report nungya taoba mapang den medemdangra taoba fiscal year nung Gross State Domestic Product (GSDP) aser per capita income renlokba nunga kanga ajema akumba sayur.

"BJP-i iba dang double-engine government ta ajar. Saka asangsang nung ibai trouble-engine government lir. Parnok nükjidong ya tiazü jembia nüburtem lemsadaktsütsü aser makamaiter ashioaktsütsüba lir," ta Sapra-i aitsü.

BJP indang mapa ya "Jhuth (tiazü), Jumla (puraloka jembiba) aser Jugglery" dang lir aser Chief Minister Himanta Biswa Sarma ya item tasa nung kanga mongin lir, ta pai ashi.

"BJP tetetzü Bharatiya Jhuth Party, Bharatiya Jumla Party, aser Bharatiya Jugglery Party. Parnok nükjidong tongtipaji telemsa adokdaktsüba ya lir, saka onoki parnok den tokteptsü asoshi sentong yanglutsü," ta Sapra-i ashi.

St. Joseph's College Jakhama indang NCC-i Kezo Basasemdang



Dimapur, Monupii/May 18 (TYO): St. Joseph's College (Autonomous), Jakhama indang 1st Nagaland Girls' Battalion NCC-Kohima nungi National Cadet Corps (NCC) Senior Wing ajanga May 17, 2025 nü Kezo Basa yimtsüng semdanga civil defence aser healthcare indang awareness sentong ka ayongzüka aser süngdong tema liasü.

Col. Lovelesh Panghal, Commanding Officer, 1 NL BN NCC den associate NCC officer ka aser PI staff ana dener cadets 20 iba sentong nung shilem agia liasü.

Süngdong atemba nung cadets aser yimtaklir temi shilem agia orange süngdong 20 tema liasü. Iba sentong tenzüka

Lance Corporal Neivitsono Kehie-i saradsadem aser iba sülen Commanding Officer ajanga o tatsüja jembia liasü.

Iba sülen civil defence indang Sergeant Thushila Yimchunger-i jembia aser Cadet Rokobino Yongo-i healthcare indang onük nung jembia liasü. Cadet Trolila Sangtam-i temeja ken ka aten.

Major Regina Razousinuo, ANO (SW) aser Medovi Yongo, chairman, Kezo Basa Village Council ajanga o tatsütsü jembia liasü.

Iba sentong nung yimtaklir 25-i shilem agia liasü. Iba mapang NCC ajanga parnoki yangluba kioktsü 110 aser eco-friendly materials amshia yangluba dustpans 60 yimtsüng asoshi agüja liasü.

Manipur: Meitei teloki Kuki kaketshir lenir aputsü akhanger



Meitei teloki ketdangsür dang KSO, Delhi tiri Meitei nunger amokmerena o jembiba anema tekeraba nung mera agitsü akhanger.

Imphal, Monupii/May 18 (Agencies): Meitei Heritage Society (MHS) of Manipur ajanga ketdangsürtem dang Kuki Students' Organisation (KSO), Delhi tir Paojakhup Guite-i Meitei nunger tepsettsü amokmeren o jembiba atema tekeraba nung mera agia ozüng agi melaba ama merenshitsü ajungshir.

Aruyaa aliba 5th Shirui Lily

Festival atema Ukhrul nungi Imphal-i aruba Meitei nungertem tepsettsü Paojakhup Guite-i ayongzüka video ya social media nung prokshia lir, koba MHS-i khukhua aija sangdong agüja liasü.

Iba video ya taoksatsüka aser rarapangsen adoktsüla lir aser Paojakhup Guite ya memerenshi metoktsütsüla aser pa kaketshir ka asünung,

pai kin ka dak tenük yoker o tamajung jembiba asoshi pa tang aliba jenjang nungi anentsütsüla, ta MHS ajanga ashi.

Guite ya teti aibelenba nisung ka lir aser taoba mapang lendong balala atalokba nung KSO ya sendaktepa lir aser item rongnung September 2024 nung Koutruk nung Kuki telungpuri Meitei civilian tem maka tepsetba mapanga par meyong ambulance amshiba densema lir, ta MHS ajanga ashi.

Pa anema Delhi Police-i March 2025 nung FIR ka benoka lir, ta parnokisa ashi.

Iba video prokshiba sülen Churcachandpur Police-ia FIR ka benoka aser pa aputsü meranga anasa aliba district tem nung tesem balala meita aor.

Pa apuba nung yariteptsü asoshi kidanger Mizoram, Assam, Nagaland aser Meghalaya state nung aliba police dang asüngdanga lir.

Hyderabad nung ki ka arongba lendong nung nisung 17 asü



May 18, 2025 nü Hyderabad nung Telangana Minister, Ponnam Prabhakar-i mi lendong atalokba tesem semdangba mapang tangokba noksa nung angur.

Hyderabad, May 18 (Agencies): Amongnü anepdang Hyderabad nung Charminar anasa asemben amentepa asüba ki tuluka arongba lendong nung tanur kar densema nisung 17 süogo. Telangana Fire Disaster Response Emergency aser Civil Defence-i sangdong ka ajanga, Gulzar House Chowrasta nung the G+2 building ka arongba osang anepdang 06:16 ako nung metetdaksüba sülen parnoki miji enseptsü merang, ta metetdaksü. Iba tesemji tonga aotsü asakba ajanga tanga fire stations danga teyari meshiba sülen parnok longjemer ghonda 2 tsüngda miji ensepteta liasü. "Miji komaser adokar kuli bushisüngdang tenzükogo aser kiojen arongba ajanga sen kwi

shi jenjang takoksa anguar tang tashi nungbo mejangja," ta sangdong nung shia lir. Telangana Disaster Response & Fire Services DG, Y Nagi Reddy-i, "Mezüng bushisüngdangba ajangabo miji short circuit ajanga adok ta bushiteter," ta metetdaksü. Paisa, "Iba lendong nung asür 17 pronglaji mokozü menemokba ajanga asüba lir, kechiyong parnok temang nung mi agi arongba tarak mali," ta metetdaksü. Union Minister aser Telangana BJP Tir, G Kishan Reddy-i, asürtemji iba dang nungjagi tali asütsüa akok, ta metetdaksü. Paisa, "Iba lendong atalokba atema ni shinga nem-a tai metongloksür, ajisüaka Hyderabad ya kanga kera

renlokba yimti tuluka kümдар, anungji police, municipal, fire department aser electricity departments tashi itshitsü nüngdak. Fire departments ket nung nüngdakba osettsüset peria mali. Kibong kati kü dang, anepdang 7:30 ako tashi nung fire tenders ket nung oset peria maliba metetdaksüogo. Ni Ato kilonser den jembiba sülen Centre sorkari takoksa anguba kibongtem nem senotsü teyari agütsütsü," ta metetdaksü. Iba osang angashia Ato kilonser Modi-i X ajanga takoksa anguba kibongtem den mangyim jashi lemsatep aser takoksa angur shia kibongtem nem PMNRF nungi sen lakh anana teyari agütsütsü aser yirua alir shia nem sen 50,000 agütsütsü ta sangdong.

Aibelenbaji tamakok anguba masü: Dr Somanath

New Delhi, May 18 (Agencies): Indian Space Research Organization (ISRO) indang PSLV-C61 mission tamakok anguba sülen ISRO nung taoba mapang chairman, Dr. S Somanath-i, aibelenbaji tamakok anguba masü, ta metetdaksü. Third stage mapang nung pressure ajema akümba ajanga Polar Satellite Launch Vehicle (PSLV-C61) mission tamakok ngua liasü. Dr S Somanath-i X ajanga, "Külem inyakertem, tanep #PSLVC61 mission nung tamakok nguogo. Ajisüaka @ISRO-i metokmeperitem bushitsü aser maneni tejakleni aotsü. Third-stage solid motor mapang nung tayongzükba aika

ajuruba asenoki meteta lir. Atangji iba ama stage ka nung metokmeperi alibaji teti ajangshia arubabo masü. Ajisüaka team-i iba timtem teraji bushitettsü ta ni tamang akar," ta metetdaksü. Anepdang 5:59 ako nung Sriharikota nungi PSLV khaketja liasü, ajisüaka rocket third stage mapang nung chamber pressure ajema akümba ajanga earth observation satellite bena aliba mission ji tamakok angu. Somanath-i, "Tesüiba küm aika item ama tayongzükbatem ajanga 'aibelenji tamakok masü saka tesayur ka dang', ta asenok tangatetba tashi itshidaksüogo. ISRO-i takok anguba ajakji timtem balala

ajangshia aser tangazüktsü aika ngua tasü itta inyakba ajanga lir," ta ashi. ISRO chairman, V Narayanan-i, "Tanü onoki Srharikota nungi 101buba launch, PSLV-C61 EOS-09 mission khakettsü. PSLV ya stage pezü aliba vehicle ka lir. Tanabuba stage tashi nungbo ajak normal liasü. Tasembuba stage motor ji junga tenzük saka third stage mapang nung mission ji metembangtet," ta metetdaksü. Paisa, "Motor case nung chamber pressure ajema kümadok aser mission ji metembangtet. Onoki ajakji asadangdar aser kobi meli osang tejangja metetdaksütsü," ta metetdaksü.



May 18, 2025 nü Haryana kübok Rewari nung Union Minister of State, Rao Inderjit Singh den tangartemi India sepaitem nem tetushi agüja 'Tiranga Yatra' nung shilem agiba noksa nung angur.

Jaishankar-i Netherlands, Denmark aser Germany semdangtsü

New Delhi, Monupii/May 18 (Agencies): External affairs minister, S Jaishankar-i Netherlands, Denmark aser Germany linüktem semdanga lenirtem den senden mena item linüktem den tesendaktep tajungba akümtsü atema jembitsü. May 19 nü pa India nungi apusoa aotsü aser anogo trok tsüngda item linük asem nung lenirtem den linük tsüngda tesendaktep, region aser international onüktem nung o lemteptsü, ta Amongnü MEA sangdong ajanga metetdaksü. Tan ita Germany nung Friedrich Merz-i Federal Chancellor menden agizükba sülen Jaishankar-i iba linük semdangtsü. Ato kilonser Narendra Modi-i Friedrich Merz nem tenüsang agütsüba den külemi India-Germany Strategic Partnership tajungba akümtsü atema inyaktsü lemsatapa liasü. Ato kilonser Modi-i X ajanga, "FriedrichMerz-i Federal Chancellor of Germany mapa agizükba atema pa nem

tenüsang agütsür. India-Germany Strategic Partnership tajungba akümtsü atema longjemer inyaktsü yongyar," ta metetdakja liasü. "India aser Denmark na tsüngda tesendaktepji akhidang nungi tesendaktep, democratic inyakim aser yimjung nung ajemdaker lir. "Green Strategic Partnership" ajanga linük ana tsüngda tesendaktep lenidaksür," ta MEA-i metetdaksü. "Ano India aser Netherlands na tsüngda tesendaktep yangluba sülen küm 75 jungogo. Linük ana tsüngda yimtenren aser rongsenkettzüng tsütsü tesendaktep kanga junga lir, aser mapang shia tongti ketdangsertem senden amenba ajanga iba tesendaktep tajungba dang akümer," ta MEA-isa metetdaksü. India aser Germany na tsüngda strategic partnership yangluba sülen küm 70 dak tali jungogo. Germany nung World War II tembangba sülen Germany den tesendaktep yanglur mezüngpurtem rongnung India densema lir.

LeT telok nung lenir, Saifullah Khalid khaset



Saifullah Khalid

New Delhi, May 18 (Agencies): Pakistan kübok Sindh nung mejangjaba nisung kari Lashkar-e-Taiba (LeT) kiralongrar telok nung tongti lenir ka, Saifullah Khalid khasetogo. Kiralongrartemi India tesem balala amakba aika nung asalentong yanglurji Saifullah liasü. 2001 küm Rampur nung CRPF camp amakba, 2005 küm Bengaluru nung aliba Indian

Institute of Science (IISc) nung International Conference amakdang professor ka asüba aser iba yiruba aser 2006 küm Nagpur nung RSS headquarters amakba nung pai shilem agia liasü. Osang angazükba agi, Saifullah Khalid-i 'Vinod Kumar' tenüng amshia küm aika Nepal nung liasü. Pai Nepal nungi Lashkar-e-Taiba mapatem inyak aser iba telok nung züngsem tasen shimokba aser teyari agütsüba nung tongti shilem agia liasü. Tawa Khalid Nepal nungi Pakistan-i aoba sülen Sindh province nung Badin district kübok Matli nung telidak liasü. Iba tesem nungjagi pai Lashkar-e-Taiba aser Jamaat-ud-Dawa atema inyak. Pai tongtibangsüa kiralongratsü atema nübo shimba aser senotsü lenmang bushiba nung shilem agia liasü.

Haryana nung Pakistan atema itdangitba mapa inyaktsür ka apu

New Delhi, May 18 (Agencies): Haryana kübok Nuh district nung Pakistan atema itdangitba mapa inyaktsüba asoshi arrshi küm 26 tebur ka puogo, ta police-i metetdaksü. Armaan-i Indian Army dak sendakba osangtem aser sepaitem inyaksangshi osangtem Pakistan den lemsatap. Pai Delhi nung aliba Pakistan High Commission office nung inyaker ka ajanga item osangji Pakistan den lemsatap. Police-i Armaan apuba sülen

court kati pa anogo troknü atema police ket nung agütsü. Armaan-i mapang talangka nungi item ama osangji WhatsApp aser social media platforms ajanga lemsatapa liasü. Pa indang mobile phone nung Pakistan nunger phone numbers den lemsatapba osangtem, noksa aser video aika liasü, ta police-i metetdaksü. BNS aser Official Secrets Act, 1923 kübok Arrla balala nung ajemdaker pa anema ken o benokogo, ta police-isa metetdaksü.



TIR YIMYIM YIMOBILEM (EDITORIAL)

DIMAPUR MONDAY, MAY (MONUPII) 19, 2025

Dimapur ajungtsüla!

Nagaland nung Naga nunger ajak meyong yimtibo Dimapur ya dang lir, kechiyong tanga yimtitem yabo pei pei kin meyong yimti ama akümer, anungji pei tetsü taso lima yimtiba nung mesüra Dimapur yimti dak alaka tanga yimtitem nungbo pei ali kimong nung pei ki sür aliyonga kibur küma sademsademabo meliteter. Ibaji kodang bilemdangdir, ajaki hau asenok ajak kibur küma litettsüba tesemjibo Nagaland nung Dimapur yimti ya danga ta shitettsü südi. Iba tangatetba nung Nagaland nung alir Naga nunger ajaki Dimapur yimti ya tangar lima nung topur tajung yimtitem mesüka kanga junga renloka oa yanglutettsüsa shisa tajung lemsateptsü aser mapa nung yariteptsü kanga nungdaker. Ajisüaka, temulung ashitsükaji, Dimapur yimti asoshi pei meyong ama küma jembir lenir aser lokti tentet aliba mejangjar. Aji oda, Dimapur nung alirtemi Dimapur nung kechi maka aser kechi kar aser kechisa nungdaker, item indangji kecha süoki ia mebilemer amato Dimapur ajungtsü indang jembibabo kangabo mangashir. Atangji, yakanü Dimapur nung Naga Council-i anir Dimapur nung tenteta aliba lokti tentettem jaoka Dimapur Railway station ulushia tajungba küma yanglushitsüba indang aser Dimapur nung ILP amshitsüba rongdak nungdak indang süoka jembiogo. Itemjia kanga tongtibang saka Dimapur yimti yimdong ajungtsüba indang, yimti nung street light tesangwa asoshi dang masü topur junga sangwa-sangwa tsükloktsü nungdakba indang, Dimapur nung tesem ajaklen asayadak aser park junga ayutsüba indang, Dimapur nung tsümar shishilembartem nangoka aitba tebilemtsü indang, Dimapur nung alirtem asoshi bener aruba osettsüsettem Dimapur tezülen Assam nung dang ayutsüsa godown yanglutsüsa atalokba tensa tia indang, Dimapur nung state stadium kümsülosü merenemtet menendokba indang, Dimapur DC office ki topur junga yanglutsüba indang amala tejembitsü aser teinyaktsü aika inyaktsüsa tanir mali timtemba angur. Dimapur nung alirtemi Dimapur DC office Chümoukedima leni bener metudaktsütsü nokdang, anungji Chümoukedima aser Niuland district ana kümlök, iba sülen Dimapur-bo kibur mali ama yutsüba tia nung angur. Atangji, ita shia tanga district nung ama Dimapur District Planning & Development Board sendena mena alitsü, ajisüaka iba amasenden ajanga Dimapur tajungba akümtsüsa o agi mapa küma inyakba kangabo mangur. Ajisüaka, Nagaland nung Dimapur melena tangsa tangbo shishilemba yimti tasen ka meyanglutettsü, anungji Nagaland asoshi Dimapur ya tangar tsüngdanga topur junga sayutsüba yimti ka lir. Ibaji angateta, Dimapur nung alirtem asoshi dang masü saka Nagaland asoshi tajangzük aser akhüm angudak asütsüsa government nung alirtem nungi shir nübortem ajak dak Dimapur asoshi tajung inyaktsü tangatetba alitsü kanga nungdaka kümogo. Aji oda, tangbo Municipal Council-a lir, anungji Naga Council-i anir Dimapur district nungi adokba MLA-tem, Administration, DMC aser lokti tentettem mapang mapang shia mena shisatsü lemsatepa mapa lemer inyaktsübaji kanga tongtibang kümogo. Tangar yimtitem den medemdangra, Dimapur yimti yabo tanga yimti nung kiyong ka shia masü, anungji asenoki temulung agüja Dimapur ya pei meyong ama meima anepalu tenzük nungbo, Dimapur yimdong nung ajem tsükbaa dena ngua asüngyongi asenoki yanglutettsü aser Dimapur nungbo anü kodanga malur ta ashitsüsa, aonunga electric tesangwa agi yimti kinükkisang ajak sangwadakja ayatsüsa asenoki melamelaa inyaktettsü. Ibaji atema yimten aser lokti nung lenirtem dak Dimapur meimba shisatsü alitsüla aser Dimapur tenüng nung asen ajangzüktsü bilemtsüba masü saka nia Dimapur asoshi kechi tenlatsü ta asüba tangatetba alitsü nungdaker. Iba amaji mebilemra, küm ishika sülenbo Dimapur nung asen akabaji jenjang makaba rongsen kümadoktsü ta Dimapur nung alirtemi angatettsüla. Aji oda, asen lima aser asen yimti junga renloktsü atema pei lima tarutsü mangdang anguba, pei asoshi masü nübortem ajungtsü bilema inyakba, wainshin aser temetetba aliba lenir aser nübortem nungdaker. Itemji asen kin nungi tama aser teimba adoktsü tim.

OLEMSABANG

HYPERTENSION

~~ Chief Medical Officer,
Mokokchung.

Temang teimtem kecha makai alitsü atema azü jajaba 120/80 mmHg aser 140/90 mmHg tashi tuadokba ajanga temolungjang, tezüngjang tashidak adoka anepaluyonga taneptsü mongui südaktsüba dang Hypertension tashidak ta ajar.

BLOOD PRESSURE CLASSIFICATION	SYSTOLIC BLOOD PRESSURE (mmHg)	DIASTOLIC BLOOD PRESSURE (mmHg)
NORMAL	LESS THAN 120	LESS THAN 80
PRE-HYPERTENSION	120-139	80-89
STAGE-1	140-159	90-99
STAGE-2	160 OR HIGHER	100 OR HIGHER

Adokba yimya/kuli:

Nisung aika 'hypertension' tashidak keta liaka, pa dak aliba mesüra adokba memetet-l alir. Anungji mapang shia temang tendanga mesüra reprangshiyima aliba ajanga tashidak nungi kümzüka alir. Temang nung tashidak adoktsü amai yimya agi sayuba kulitem:

- * Tekolak anguba
- * Tangu sashi junga mesütetba
- * Tezüdanga aliba
- * Tuko anguba
- * Temolungjang arakzüba nung Teimtem adokba aser
- * Teni nungi azü ayimba amala

Azü jajaba nung teimtem agütsüba

- * Moko achiba ajanga
- * Achi ajem teim-l machiba ajanga
- * Temesepba yi ajemba agi
- * Temang arakzüa maliba ajanga
- * Anibelema/ shisabulua aliba agi
- * Temang tali chizüka/ yira-a akümba agi
- * Chiongtsü achidang metsü tali achiba ajanga
- * Azü jajaba mesüra temesen nung temo amala tali kümadokba
- * Chini tashidak agi

KEEP CALM

Nokdangtsü leman

- * Temang tuozük shidak ayutsüla
- * Mapan gajak nung temang arakzüa aliba
- * Achi ajem kümdanga achiba'tetezü' metsü aser temo chiyongtsü ajema achiba den süngo-lio aser süngjang lijang tapet chia aliba
- * Moko Sali achiba aser yi ajemba nungi pila-a aliba
- * Anema alitsüyim tapet inyakyim meteta benshitetba

Anepaluyim:

Meimchir shia tashidak palala agi teim atemdang, mapang tatong nung mozü palala agia anepaluyong temolungjang pokma-a asüba mesüra junga maraksütet-l zükdaka oadokba nungi kümzüker.

- * Stroke bu upto 40%
- * Myocardial infarction by 25% (azü jajaba tali asübayong temolungjang)
- Küp melema kümdakja-a tasü kümdaktsüba)
- * Temolungjang marakzüi südaktsüba

Kar iba tashidak lir-a

- * Anema alitsü yimya süpa-ang
- * Kidang mapang shia temang nung azü jajaba yimya tendanga aliba
- * Mapang shia blood sugar, cholesterol level aser urine albumin reprang shiyima aliba
- * Medical tesayuba angazüka litetba
- * Tesayuba anga-a tapet mozü/chiyongtsü achiba agi BP ajemdakja-a temang junga kümdaktsüba

Teyari angutsü atema iba den tongtepratepang:

State NCD Cell

Directorate of Health & Family Welfare Nagaland, Kohima

Email: npcdcnagaland@gmail.com

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Vatican, May 18, 2025: Amongnü Pope Leo XIV semzükba sentong nung adentsü atema pa St. Peter's Square-i aodang tangokba noksa nung angur. Iba sentong nung linük balala nungi tongti lenirtem 150 densema nisung 250,000 shi aden.

Japan nung tanela asentenshi milak jangrutsü: Jiang Dao

May 17, 2025: China nunger sayutsüngir, Jiang Dao-i Japan nung missionary mapa inyaker aser Japan nung tanela asentenshi milak jangrutsü atema atar.

Arrshi küm 80 dak tema sayutsüngir Jiang Dao-i China kübok Wenzhou toktsür aoba sülen tang pa Japan kübok Osaka yimti nung missionary mapa inyaker.

Jiang Dao ya China nung Zhejiang province kübok Wenzhou nung aso aser yangji aliba Arogo ka nung küm aika toklang tenzüka liasü.

Coronavirus wara sülen pai par kibong den Wenzhou jila toktsür Japan-i oa Osaka nung jenok aser yangji Khrista osangtajung lemsatepa mission wadang inyaker.

Wenzhou ya mapang ka nungbo China nung house church movement tulutiba aliba jila ka liasü, saka tangbo Wenzhou tesem ajaklen osangtajung prokogo, ta Jiang-i ashi.

1866 küm tetenzüklen British nunger missionary George Stott-i mezüng China Inland Mission kübok Wenzhou-i Yisu Khrista osangtajung bener arua liasü aser pai küm 26 tashi iba jila nung osangtajung prok.

Pa sülen Methodist missionary William Soothill 1882 küm Wenzhou-i aruba sülen Khrista osangtajung prokba den külemi hospitals aser school aika amenokja Zhejiang province nung Khristan yimsü aintsü atema tamendakdak yangerja liasü.

"George Stott mapang nungi tenzüka tang tashi nungbo Wenzhou tesem ajaklen Khrista osang tajung prokogo. Tanübo Wenzhou kübok aliba yim shia nung Tenla ki ana-asem lir," ta paisa metetdaksü.

Jiang-i, "Wenzhou nung Arogotemi rongsen ajak pei atema dang mamshitsüla saka tangalen mission mapa inyaksüla. Sen million jenti indoka Tenla ki aika süogo. Ajisüaka software tsütsü Wenzhou nung aliba Arogotem tesülen atsüngzüka lir. Arogo nung tenzüker taintem aika bendanga tenzükertem lir," ta metetdaksü.

2013 küm Zhejiang province

nung sorkar ketdangsertemi Tenla kitem nungi Kangki kangshia agizükdaksüba sülen raksaja liasü, aser iba dak sendakba nung Jiang-i, iba ya Wenzhou nung aliba Arogotemi pei Arogo rongsen ketdangsüba asadangtsü mapang ka lir, ta ashi.

Zhejiang province nungsa Communist sorkar ketdangsertemi Sunday schools ajak shibangdaksüba atema pai tesasaba lemsatep.

China nung ketdangsertemi yimsü temeden azüokba den külemi talisa Wenzhou nung house churches aser lenirtem anema inyaker, ibayongji pai China toktsür oadok.

Jiang-i, "Mission mapa ya Yisu-i Khristan ajak nem nunglochtsüba tenyaba wadang lir. Mission medenibo tamang tashi samatsü," ta ashi.

Jiang-i, US, Hong Kong, Taiwan aser Singapore nungi missionary tem aika Japan nung yakyaka inyaker, ajisüaka China nungi aruba missionary tembo mali, ta ashi.

Jiang-isa, China nung aliba

Arogotemi Japan nung pa mission mapa nungita yaritsü memelunger, ta metetdaksü.

Wenzhou ya "China nung Yirusalem" ta ajar aser Wenzhou nung alirtem dang 'Anüdoklen aliba Yihuda nungertem' ta ajar.

"Japan nung yimsü aika lir, saka Khrista osangtajung mali," ta pai ashi.

Tang Japan nung mission wadang nung pa kanga azüngmeyaker, ajisüaka tarutsü nung Japan nung tanela asentenshi milak jangrudaktsütsüji pa nükjidong lir.

"Japan ya nüburtem longjema aliba linük ka lir, anungji yangi tanela asentenshi milak jangrura ibaji ajanga temelenshi tulu adoka kongshitsü. Tesüiba mapang Korea nung atalokba ama Japan nunga tanela asentenshi milak tulu jangrutsüji kü teimla lir," ta paisa metetdaksü.

"Japan nung tanela asentenshi milak jangrura ibaji ajanga Asia dang masü saka alima rangben kongshitsü," ta paisa shisem.

ANOGO ABEN TSÜNGREM DEN

Temeneni asenok nokdanger

Anungji mepet tulu ama kuli aika agi asenok meketbang nung asenoki tenokdangtsü ajak aser sotaka aliba temenen toktsür. Ibri 12"1

Asenok tsükchir tamajungtibaji temenen lir. Temeneni Tsüngremi asenok asoshi yangluba tajung ajak raksatsütsü meranger. Pauli temenen taaji tasüba ta ashi (Rom 7:11). Ibai kanga tekülak. Asenoki bilema maliba mapang ka nung temenen asenok dangi aiter. Iba yagi asenoki aginütsü süa tepuatsü keta sayur (2 Kor. 11:14-5).

Temeneni kanga kümdanga meilung meilungi asenok meketbanger. Asenok temenen sang nung pua ali tashi asenoki alizüng tonga kodanga masemtettsü. Temenenji kechi asenoki angateta ali nung dang asenoki iba nungi jenbua alitsü. Asenoki temenenji aibelen ka, yimya tamajung ka mesüra tashi mait ka dang ta bilemra, asenoki iba tesoetba nungi kodanga mepilatettsü. Asenok menen asenoki tangar dak kodanga matongtsüla. Asükümi ajemalurtemji shi nemja jembitsür. Iba küboki asenoki kodanga maitsüla. Temeneni asenok tenük tapok kümdaktsür. Temeneni kodanga ozüng magütsür, iba yagi tekülak agi asenok tanelaren tashi ajak zükladaktsür aser takok tashi ajak asenoki nungi agiadoker. Asenok asoshi osangtajungji Tsüngrem taochi temenen talenba ajak atendanga aor. Tsüngrem taochi agütsüba nüji temeneni noktangtsü makok. (Rom 5:20).

Temeneni ne taochi rakzüka lir asü? Iba yagi na tajungtiba kinüngtsü, tajungtiba jabaso, tajungtiba jala, tajungtiba mesüra tembar tajungtiba akümstsüba nungi sotter asü? Iba yagi na tanelaren tashi akümstsüba nungi sotter asü? Na temeneni noktangya lira, Tsüngremi tangsa salatsütsü. Tsüngrem taochi ajak dang kasa inyaker.

Khristan lenirtemi 'Shine Your Light' evangelism campaign tenzük

May 17, 2025: Tawa London nung Khristan lenir 100 dak tali longjemer 'Shine Your Light 2025' evangelistic campaign tenzükogo.

UK tesem ajaklen yimti lenmangtem, markets aser kiyong balala nung Khrista osangtajung proktsü nükjidong nung iba campaign ya tenzükogo.

Iba sentong ya National Day of Prayer and Worship (NDOPW)-i ayongzüker aser International Freedom of Religion & Belief indang All-Party Parliamentary Group nung Chair, MP Jim Shannon leniba nung agir.

2023 küm Shine Your Light campaign tenzükba mapang nungi tang tashi nung Arogotem teimba-teimbai iba campaign nung shilem agia arudar. Yaküm iba campaign nung shilem agiba Arogo 738 liasü saka tangbo 1,500 kümogo.

UK nung denominations aser networks 60 nungi Khristan lenirtemi tanela nung

longjemer tesüiba mapangtem inyakba asadangba den külemi tarutsü nung teinyaktsü wadang atema asalentong yanglua inyaker. Item rongnung June 6 nungi June 8 tashi ghonda 72 UK tesem ajaklen sarasademtsü aser December 12 nungi December 14 tashi Khristmas dak sendakba sentongtem ayongzüka agitsü densema lir.

Iba campaign tetenzük sentong nung New Testament Church of God & United Christian Broadcasters nungi Bishop David Edwards, Share Jesus International nungi Andy Frost, broadcaster aser pastor James Lusted aser Ichthus Christian Fellowship nungi Lydia aser Henry George nunger densema liasü.

Churches Together in England nung Tir, Rev. Dr Tessa Henry-Robinson leniba nung sarasadem mapang agia liasü aser UK tesem balala nungi lenirtemi kuli lemsatep. Birmingham, Bedford,

Canterbury, Wales & Scotland nung Khristmas outreach sentong kanga junga agiba osang lemsatep.

NDOPW Convenor aser Shine Your Light movement tenzüksang, Dr Jonathan Oloyede-i, "Tan hopta Parliament nung lenir 100 dak temai iba mission, telongjem aser sarasadem nung Kibubai mapa inyakba lemsatepa aruogo. Asenoki asemji piladaktsütsü makok saka ka küma longjemdaksütsüla," ta ashi.

"2023 küm Shine Your Light tenzükba sülen iba campaign kanga renlokogo, ajisüaka Arogo ka ama asenoki iba dang nungjagi taliba inyaka asen Kibuba Yisu Khrista osangtajung lemsateptsü nüngdak," ta paisa metetdaksü.

"Westminster tiyongtsü nung sarasademba ya temaitsü tajung ka lir. Taruba hopta ishika tsüngda Pentecost amongtsü atema renemba mapang nung asenoki asen nüburtem atema sarasademtsütsüla, kechiyong

Pentecost mapang Tanela Temeshi meküplochtsüba ama kasa Tanela Temeshi nüburtemi nüngdaker," ta pai ashi.

Congregational Federation nungi Jim Lyon-i Northamptonshire nung Shine Your Light sentong agiba lemsatep. Pai, "Yaküm December ita nung onoki nüburtem ayongdena Khristmas osang lemsatepa liasü. Ni Khristan ajak dang na aliba tesem nung Shine Your Light sentong agitettsü atema maongka meshia sarasademtsü ajungshir," ta metetdaksü.

Iba sentong tembanga Shannon-i, "Shine Your Light Parliamentary Reception sentong ayongzükteta akba ya ni asoshi maongka liasü. Parliament tesem ajaklen Khritanemi Shine Your Light tanela ya kechiar metetogo. Tammang lima nung Tsüngrem tesangwa ngudaktsütsü atema Khristanemi tasü itta nokdaksü ni ayongzüker," ta Shannon-isa ayongzüker.

AO OSHI ANGAZÜKDAK:**TANÜ ANGAZÜKTSÜBA OJANG****Temzük**

(v) lepzük, tatsütsü leptok (chop off)

* Jara ataktsü aliba ani ajak tatsütsü temzük.

Ten

(n) alu wadang telemsa (segment of a field)

* Alu mapa nung ten marem meyutsür.



Tir Yimyim

OLONG PAITEP # 7155

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüing - (4)
9. Tase apok - (6)
11. Songtem - (3)
13. Ata liasü - (5)
16. Tzüinglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN


1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasatsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7154 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso.

LANGTSÜNGLEN :

1. Alimang, 2. Pongen,
3. Samaru, 4. Nün, 6. Pio,
9. Nüingdak, 10. Yongya,
11. Kongro, 13. Ora, 14. Ata.

NAI-A YA METETTER MA

United States nungi arishi küm 39 tain Leila Noone-i Guinness World Record ka yangluogo. Noone ya professional circus performer ka lir aser la kou agi dang minute 25 minutes ser second 11.3 sangzüba atema alima otsü tasen yanglu.

California nung aliba Redwood National and State Parks nung lai iba otsü yangluteta liasü. Noone-i iba otsü yanglutsü atema küm ana renema aru ta metetdaksü.

Meghalaya nung Rs 30 crore Living Root center yanglutsü

Shillong, May 18, 2025
(Agencies): Meghalaya Chief Minister Conrad K. Sangma-i Wahlyngkhat, Pynursla semdangdang Living Root Experience Center yanglutsü atema Rs 30 crore lemozütsüba osang metetdaksüogo.

Tourism ajungkettsü aser state nung sobaliba senmang balaka wazüka ayutsü atema sen

lemzüktsür ta pai ashi.

"Pynursla kübok Wahlyngkhat nung Living Root Experience Center yanglutsüba tesem semdang. Tourists aser hikers asoshi Root Bridges tsütsü aoba trekking route ajungketba repringdang" ta CM Conrad-i ashi.

"Asen lisopur sobaliba ajangshidaksütsü atema

Wahkhen Residential Music Retreat yanglutsü" ta paisa metetdaksü.

Iba mapatong nung Living Root Bridges tashi aoba trekking route tajungba akümtsü ta Conrad-i ashi.

Living Root Experience Center ya Community Public Private Partnership (CPPP) model nung yanglutsü.

Manipur Kuki Chiefs-i Shirui Lily festival nung yariteptsü

Imphal, May 18, 2025
(Agencies): NH-202 (Imphal-Ukhrul road) nung aliba Kuki village Chiefs-i 5 buba Shirui Lily Festival nung yariteptsü nangzüko.

Shirui Lily Festival ya Manipur nung tongtipang sobaliba sentong ka lir aser Ukhrul district nung May 20 nungi 24 tashi amungtsü.

Ukhrul nung Tangkhul Naga

Long (TNL) aser Kuki village chiefs tsüingda senden ka amenba sülen iba tenangzüka agütsüogo.

Ukhrul district kübok parnok telongtet nung kija mesüra yimtsüng shingaia garitem mesüra süisübingertem mesotsü mesüra mita mereprangtsü ta TNL-i sangdong ka nung metetdaksü.

May 14, 2025 nü Kuki Village Volunteers-Eastern Zone (KVV-EZ) ta ser telok kati Meitei nunger amokmerenba sülen TNL aser Kuki village chiefs tsüingda senden menogo.

Manipur Chief Secretary, Prashant Kumar Singh (PK Singh)-ia Shirui Lily Festival atema security maparen akangshiba osang metetdaksüogo.

BTC Education Department nung Rs 4 crore tim mesüi amshi

Guwahati, May 18, 2025
(Agencies): Bodoland Territorial Council (BTC) nung sen crore aika tim mesüi amshiba putetogo aser iba ya Education Department nung kaket aliba indang lir.

BTC Chief Executive Member Promod Boro kübok Education Department nung Rs 4 crore shi tim mesüi amshi aser iba ajanga BTC elections atongtsü anasa Bodoland Territorial Region (BTR) nung ken o tulu ka adoka lir.

Bodoland University den sendaktepa aliba college 33 dangi kaket yokba dak sendakba nung senotsü tim mesüi amshi ta ken o adoka lir.

Senior lawyer Vijay Kumar Gaur-i anir Delhi nung amenoka aliba legal firm Lal & Associates ajanga BTC ketdangsür aika dangi legal notices yokogo.

BTC ketdangsürtemi tasa tamajung atongba, ashikülak mapa inyakba aser sorkar sen tim mesüi amshiba atema tai tonglokja lir.

Legal Notice nung tai tonglokja alirtemji Vice-Chancellor Bodoland University B.L. Ahuja, Director of Education BTC Jagdish Prasad Brahma, Secretary of Education BTC Amarjyoti Barman, Principal Secretary of BTC Akashdeep aser affiliated colleges 33 Principals lir.

Ozüing alema Prashant Jain

**BTC Chief Executive Member Promod Boro**

(tasa atongsang), Rahul Jain (pa tenu), Mohit Kumar Jain aser Gaurav Jain nunger nem temelaba agütsü ta Legal Notice nung shia lir.

Item nisungtem yagi blacklisted publishers ajanga kakettem supply asü. Blacklisted publishers rongnung Indica Publishers & Distributors Pvt. Ltd., Rehab Books, Adi Books, Metro Books Pvt. Ltd. aser Shri Publishers dena lir.

Item nisungtemi jenjang tasak agi education system nung pirated aser substandard books ayok. Parnoki Rs 500 jenjang kaket ka Rs 15,000 yong ayok.

Iba maparen nung Jagdish Prasad Brahma-i Rs 6 lakh, Amarjyoti Barman-i Rs 5 lakh, Khagen Kalita (Librarian, Bodoland University)-i Rs 50,000 aser Sunil ta ser nisung kati Rs

1.5 lakh süpokrem meshia agi ta tai tonglokja lir.

BTC Chief Executive Promod Boro-i Education portfolio bena lir aser pai osangbener den jembidang iba ken o atema bushisüingdang ka tenzüka ashi.

"Iba ochimashi mapa ya ataloka lira ozüing tapet agi merenshitsü. Contractor kari danga pirated mesüra substandard books supply süa lira metoktsütsü. Public sen poisa ka danga tim mesüi amshiba merenshitsü" ta Promod Boro-i ashi.

"Education sector nung iba ama ochimashi inyakba ta maaksü lir. Assam Chief Minister Dr. Himanta Biswa Sarma tebang aittsüla aser bushisüingdang ka asütsü tuyutsüla" ta BPF Youth Wing president Rinjoy Boro-i ashi.

Ukraine rara tera samatsütsü Russia nükjidong lir: Putin



Moscow, Monupii/May 18 (Agencies): Russia Tir Vladimir Putin-i Deobarnü ashiba agi, Ukraine den rara tenzükdaktsüba tera samatsür Russia kumzüka yuner. Moscow indang nükjidong ya iba rara tenzükdaktsüba tera samatsütsü, teti asoshi yimjung alitsüsa tensa adokdaktsütsü aser Russia indang security guarantee ya lir, ta Putin-i Russian state television nung ashi. Russian sepaitemi Ukraine shilem 20 shi amokbanga lir, aser item nükjidong nung takok

angutsü rongsen peria lir, ta pai ashi. Otsü yanglua Russia-i Honibar aonung Ukraine dak drones züngse mezüngmai khalokja tetsür ka tepset, ta Kyiv regional Gov. Mykola Kalashnyk ajanga jangjatsür lia iba sangdong ya agütsü. Küm asem nung tang mezüngbuba Ukraine aser Russian ketdangsürtem tsüngta tang mezüngbuba indang-indanga ajurutepa jembishinü kar anogo ana lir ibai ataloker. Ukrainian air defence ajanga ashiba agi, Russia-i Shahed

attack drones aser danga imitator drones tabu balala 273 yokba nungi 88 takok ngua raksatsü aser 128 yagi targets metongteti teraksatsüba meliasü. Ukraine indang deputy prime minister Yulia Svyrydenko-ia taoba mapang iba ama drones yokba mali aser ibai Russia-i civilian tem dak tenük yoktsü tebilemba lir ta ashi. Honibar aonung aser Deobar anepdang Ukrainian drones 25 anüng tom nung lia khazüka yok ta Russian mitkar ketdangsürira ashi. US Tir Donald Trump, shibai election nübuyimba mapang iba rara ya pai tekeratiba nung angatetteptsü ta yimjak nung jembia liasü, pai Hombarnü Putin den telephone ajanga jembitsü sentong ka aliba sangdongogo. Russia-i Honibar aonung drone operations agiba Ukraine ketdangsür temi khukhua aitsür. Zelenskyy indang senior advisor Andriy Yermak-i Istanbul nung yimjung ken o jembishinüba nung temulunglemtsü mali aser Putin-i maneni raraner ta aitsü.

Somalia nung pei temang nung bomb alenoker pokdaktsürtemi nisung 10 tepset

Mogadishu, Monupii/May 18 (Agencies): Somalia yimtiba Mogadishu nung army recruitment centre ka nung pei temang nung bomb alenoker pokdaktsürtemi nisung aika tepsetogo. Deobarnü item nisungtem yagi sepia nung adentsü atema lanurtem Damanyo base kima tarensena nokdaker aliba amakba sülen nisung 10 tepsetogo, ta Reuters news agency sangdong ka ajanga metetdaksü. Abdisalan Mohamed-i ashiba agi, pa bus ka nung mener süia aoba mapang lanur noklang aika kikümbang nung nokdaka aliba nguogo. "Iba tesem nung bomb ka apok aser mokozü agi longbangatok. Onoki nisung asürtembo tejangja memetet," ta

pai shisem. Military captain Suleiman-i ashiba agi, pai iba tesem amakba ya ngua liasü. "Ni lenmang tezülen liasü. Tuk-tuk ka kanga kara arur anen aser nisung ka lanurtem tarensena nokdaka aliba tesemi asema ao aser bomb pokdaktsü. Ni nisung 10 asüba nguogo, kong recruit tem aser süisüpongertem densema lir. Asürtem timba akümtsü akok," ta pai Reuters dang ashi. Bomb apokba tesem nung tsüngsem aika aser bomb pokdaktsüasang temang ajaras aliba nguogo. Military hospital nung medical staff temi Reuters dang ashiba agi, bomb apokba nung yirur parnok 30 mozükidangi anir aru aser parnok trok süatok. Kasa mapang nung

ketdangsürtemi Anadolu news agency kati ashiba agi, iba lendong nung nisung 11 süogo. Iba bomb pokdaktsüba indang telok kati danga nangzüka mali, saka iba tesem amakba ya 2023 küm Jale Siyad base nung sepai 25 tepsetba den mesükteper. Honibarnü Battalion 26 commander Colonel Abdirahmaan Hujaale, Hiiran tesem nung tepsetba sülen tang iba lendong atalokogo. Local osang balala ajanga ashiba agi, al Shabab teloki sorkar aser security force facility tem maka liasü. Al-Shabab telok ya küm metsü shi Somalia sorkar den rara arudar aser parnoki mapang shia sorkar ketdangsürtem aser sepaitem maka arudar.



Bucharest, May 18 : Romania tir election tanaben agishiba mapang nüburtemi Fagaras, central Romania nung May 18, 2025 nü vote agütsüba noksa nung angur. Romania linük tir asoshi Alliance for the Union of Romanians lenir George Simion aser Bucharest mayor Nicusor Dan na tokteper.

SÜR KÜM 4 AJUNGBA BILEMTETER

Asür K. TIASUNEP TZÜDIR
Tasüba anogo 19-05-2021



Asen tamasa aliba ama aoyiji ali-i meyiper, aser tanülajibo tagütsüsang Tsüngrem dangisa shilangtsü. Apijemtsü Shin 12:7 Temeim Oba, Shia aruba anepdangji asenok ajak Yisu tsüngdang ajuruteptsü, yangjibo kodanga senshidi ta mashitsü. Asenok süaka aser aliyonga asenok Pa den külemi taküm alitsü asoshi Pa asenok atema asü. 1 Thessa 5:9-11

Nai teti meima aliba, Kinungtsü / Jala / Jabaso / Tzüraburtem aser Kinungertem



Gaza, May 18 : Gaza Strip north tsütsü Jabalia refugee camp nung Israel-i tayimysü amshia amakdak May 17, 2025 nü Palestine nunger mang ayimba noksa nung angur. Honibarnü Israel-i Gaza Strip amakdang Palestine nunger 64 tepset ta Civil Defense ajanga ashir.

Gaza north len mozüki kata nunga nisung meyariteter

Gaza City, Monupii/May 18 (Agencies): Gaza north len alima public hospital asemprong "out of service" nung yua lir, ta Hamas meyong health ministry ajanga ashi, kong Israel-i tanen makai iba territory amaker. Deobarnü Israel sepaitemi Beit Lahia nung aliba Indonesian hospital ya lungbanga injang khaloktsü aser shiranger, medical staff aser supplies aruba nokdang, ta ministry ajanga ashi. Gaza north tsütsü iba mozüki ya tatembangba lapoka liasü ta parnoki ashi. Ita aika tsüngta Gaza nung tang tesashitiba makyonga arudang Honibarnü Israel mitkari "Operation Gideon's Chariot" sangdong. Honibarnü jembishinü tasen akaba sülen anogo 60 rara anena atatsü aser Palestine nunger tepuokdak alir chiochtsü melen parnoki pua aliba nisung toku chiochtsü maongka agütsü ta Palestine nunger ketdangsür kati ashi. "Beit Hanoun Hospital aser Kamal Adwan Hospital raksatsüba sülen tang Indonesian Hospital nung shiranger anepalu mesütetba ajanga northern Gaza Strip nung public hospitals ajunga nung service magütsütetü kumogo," ta health ministry ajanga Deobarnü ashi. Gaza nung raraba tembangtsü densema Hamas den tezüngzüktep ka yanglutsü

Israel mulunga lir ama Israel Ato Kilonser Benjamin Netanyahu-i yimya kar ajanga sayur. Qatar nung aliba Israeli team yagi takoktsü lenmang balala bushir aser yangji US special envoy Steve Witkoff-i mapang tatsüka atema ceasefire alitsü aser pua alir-tepuokdak yua alir kar melenteptsü mesüra full agreement ka ajanga rara tembangtsü benoka aliba densema asadangtar, ta ato kilonser indang office ajanga ashi. "Tangya Doha nung aliba jembishinür temi kanga anibeleva tezüngzüktep ka atema akokba lenmangtem bushitar - kong Witkoff framework nung aliba ama asütsü asü masü ta asadanger, aser yangji pua alir ajunga chiochtsü, Hamas terrorists tem linük nungi jendoktsü aser Gaza Strip nung disarmament dena lir, ta pa indang office ajanga sangdong ka nung ashi. Ceasefire tezüngzüktep nung Hamas ya iba tesem nungi jendoktsü aser Gaza indang disarmament adentsüla, ta sangdong ajanga ashi. Gaza health ministry ajanga ashiba agi, Israel-i October 7, 2023 nungi tenzüka tashiyim amshia amakba nung asür nisung 53,339 jungogo aser 121,034 yirur lir. Tesüiba ghonda 24 tsüngta yirur aliba nisung 361 tashi mozü ki balalai anir ao ta ashi.

Real Madrid-i Dean Huijsen alizükogo



Monupii/May 17, 2025

(Agencies): Real Madrid-i arishi küm 20 tain Spain nunger international asayar Dean Huijsen, English club Bournemouth nungi alizükba osang Honibarnü jangjatsüogo.

Lanur defender yagi club den tenangzüktepba ka yangluogo aser pa Madrid nungi 2023 küm tashi asayatsü. Madrid-i pa indang pound million 50 release clause trigger süja liasü.

Pa tang asaya aliba season

tembangba sülen Madrid nung adentsü aser pa FIFA Club World Cup nungbo asayatetsü.

Huijsen, shiba professional career Spain nung Malaga nungi tenzuka liasü, pa 2021 nungi 2023 tashi Serie A nung Juventus nungi asaya aser iba sülen Roma-i oa laisü. 2024 küm Roma nungi takok ngua asayaba sülen pa English club Bournemouth-i alizük.

Premier League amala kanga kara asayaba league ka nung Bournemouth nungi junga

asayaba sülen pa Spain national team nungi asayatsü atema shim aser club aikati pa alizüksü jangraba lemsatepa liasü.

Ajisüaka tatem nung Real Madrid puri pa alizükogo, shirnok head coach Carlo Ancelotti-i club toktsüba sülen team yanglushitsü merangba mapang ka lir. Tang asaya aliba season tembangba sülen Ancelotti ya Brazilian national team head coach akümtsü.

Bayer Leverkusen nung mezüng küm kanga junga inyakba sülen taoba mapang Real Madrid midfielder aser World Cup koker aliba asayar Xabi Alonso-i Italy nunger coach ya melentsü imlar.

Alonso lenisüba nung Leverkusen puri 2023-24 season nung asaya ka nung danga tamakok mongui Bundesliga koka liasü aser iba ajanga pa alima nung club temi aginüa aküm. Tanabuba season nunga Alonso lenisüba nung iba German club yagi kanga junga asayaogo, saka parnoki title bo defend mesütet aser Bayern Munich-i kokogo.

Travis Head LSG den asaya nung shilem magitettsü

Monupii/May 18, 2025

(Agencies): Sunrisers Hyderabad (SRH) pur tang asaya aliba India Premier League nung Lucknow Super Giants (LSG) den kanga dang tongtibang asaya ka asayatsü lia Australia nunger opener Travis Head temang majungba ajanga masayatetsüsa kümogo.

SRH head coach Daniel Vettori-i ashiba agi, Head dak tawa Covid-19 tashidak putetogo aser iba ajanga pa team den mesenzütetsüsa kümogo.

"Tia maka pa dak Covid-19 tashidak putetogo aser ibayongji pa mesenzütetsüsa kümogo," ta Vettori-i osangbenertem dang ashi. "Pa taruba asaya atema aneper lia squad nung dentetsü imla atadar," ta paisa shisem.

Taoba küm final tonga asayaba SRH team taküm IPL playoff nung asayatsü atema kecha maongka mali kümogo aser kasa mapang nung LSG puri tanungba asaya asem koka point 16 tongtetra parnok playoff-i aitsü maongka lir.

Anungji iba asaya ya SRH dang nungibo LSG pur atema kanga tongtibangba asütsü.

SRH atema asayar kar asoshi asayamung tepeyong junga masayateti aruba küpzüksü asoshi maongka ka asütsü, kechiyong item asayartem yagi imlaba ama junga masayatetba ajanga parnok takoksa ajuruogo.

Nitish Kumar Reddy aser Ishan Kishan nunger amala asayartemi tanungba asayatem nung run karbo yanglunetsü, kechiyong parnok India A team nung dener England nung oa asayatsü lir.

SRH team nungi Abhishek Sharma (311 runs) shiba Punjab team nungi red ball asayamung nung teti asayar pa England nung oa asayatsü atema India A team nung mezüngoksemi liasü.

SRH aser LSG na Hombarnü asayatsü lir aser iba asaya nung Abhishek-i junga asayatetsü imlar, kechiyong LSG bowler temi imlaba ama kangabo junga masayateti arudar.

HI-i Junior Women's Hockey team sangdongogo

Monupii/May 18, 2025

(Agencies): Hockey India-i taruba Four Nations Tournament atema junior women's team nung asayar 24 tenüng sangdongogo. Iba asayamung ya Rosario, Argentina nung May 25 nungi June 2 tashi asayatsü.

Iba asayamung nung Argentina, Uruguay, Chile, aser India asayatsü. Decembr ita FIH Hockey Junior Women's World Cup atema renemshiba nung shilem ka ama India team iba asayamung nung team ajak den anabenben asayatsü, aser iba mapang team asayaba yimya asadanga tasatem arantetshitsü.

India team ya goalkeeper Nidhi lenisüba nung asayatsü aser forward Hina Bano Vice-Captain asütsü. Team nung

Engil Harsha Rani Minz tanabuba goalkeeper aser Vidyashree V standby ama shimogo. Defence nung Mamita Oram, Lalanthluangi, Manisha, Puja Sahoo, Parwati Topno, Nandini, aser Sakshi Shukla nunger densema lir.

Midfield nung Priyanka Yadav, Anisha Sahu, Rajni Kerketta, Binima Dhan, Khaidem Shileima Chanu, Sanjana Horo, Supriya Kujur, aser Priyanka Dogra nunger lir aser Huda Khan o Munmuni Das na standby midfielders asütsü.

Forward nung asayatsü atema Hina Bano, Sonam, Sukhveer Kaur, Geeta Yadav, Lalrinpuui, Kanika Siwach aser Karmanpreet Kaur nunger shimogo aser Selestina Horo standby forward asütsü.

Team shimba indang jembiba mapang Indian junior women's team coach Tushar Khandker-i ashiba agi, "iba squad nungi asayar tajungtibatem shimtsü merangdar kechiyong Junior World Cup asayatsü ita trok dang anunga lir. Iba asayamung ajanga asayartem international jenjang nung asayatsü atema maongka agütsüba den tajangshiba agütsütsü. Tarutsü atema bilema parnok senior team-i aiba mapang kecha tetsükdaktsü madoktsü atema inyakdar aser iba ya parnoki World Cup amala asayamung tongtibangtem nung junga asaya nung dang takoktsü asütsü.

Iba asayamung nung India team May 25 nü mezüngbuba Chile den asayatsü lir.

Italian Open: Paolini-i alizüng tasen tongtetogo



Monupii/May 18, 2025

(Agencies): Italy tsür Jasmine Paolini ya 1990 küm Monica Seles sülen Italian Open nung kija aser tarep asaya naprongla akokba mezüngbuba asayar kümogo.

La aser Sara Errani nati Deobarnü Italian Open tetsür tarep asaya nung Veronika Kudermetova aser Elise Mertens na 6-4, 7-5 agi akokba sülen iba alizüng tongteta liasü.

Italy tsürla ana yagi taoba küm Paris nung linük atema Olympics nung mezüngbuba gold medal ngua liasü aser Deobarnü Italian Open final asaya nung tena set anaprongla nung game pezüzü agi tesülen aliba nungi meyipa tur asaya kokogo.

Honibarnü Paolini-i tetsür kija asaya nung taoba mapang US Open champion Coco Gauff straight sets nung akokba sülen la ya Italy tsürtem rongnungi 1985 küm Raffaella Reggi-i iba asayamung akokba

sülen iba asayamung akokba mezüngbuba asayar kümogo.

Paolini ya Vera Zvonareva sülen 1000 series event ka nung kija aser tarep asaya naprongla akokba tetsür asayar tanabula kümogo.

Honibarnü tetsür kija asaya nung Jasmine Paolini-i 6-4, 6-2 agi Gauff straight set nung koka iba ita Roland Garros asayatsü lia la la sasa dak kanga temlung lemteta kümdaktsüogo.

Arishi küm 29buba nung Paolini ya Open Era nung Rome nung iba asayamung akoker rongnung tantsütila kümogo. Kasa mapang nung Gauff shiba la dang nungi küm ti agi tanutsü lir, la Serena Williams' sülen iba asayamung akoker rongnung tanutsütila akümtsü maongka liasü saka lai magitet.

Final asaya nung Gauff-i unforced errors 55 mena aser service aoba mapang double faults tenet mena liasü aser iba ajanga Paolini nem takok agüja liasü.



Thailand Open tetsür kija final asayaba sülen takoker China tsü Chen Yufei (tachichi) aser runner-up Thailand tsür Pornpawee Chochiwong na tangokba noksa nung angur.

BILEMDANGANG

"Tamang agi tesangwa shisangdaktsür."